

25307

Med.

Metz. 25.307


GEORGII ERNESTI STAHL,
D. PROF. PUBL. ORDIN. h. t. FACULT.
DECANI,

PROPEMPTICON INAUGURALE

**QUIS BONUS THEORE-
TICUS, MALUS PRACTICUS.**



987.



Illæ Artes, quæ manuum im-

mediato adminiculo perpetrantur, adeoque agilitatem versatilem harum requirunt, ex solâ speculatione ad perfectam habilitatem perficere non possunt; sed longo & multiplici exercitio opus habent, neminem quidem ejus rei admiratione tactum iri, certo confidimus. Si verò talis *Ars* detur, quæ actus

suos per organa *emissicia* perficere possit, neque illorum aliam *directionem* adhibere necesse habeat, nisi solam *opportunitatem* temporis, & *proportionem* mensuræ; & potissimam suam partem, consistat in *selectu* tantum *judicioso* potius, quàm ullâ *applicationis* difficultate: Ea cur speculatione, *intellectu*, inquam, & *memoria*, tota hauriri & comprehendere non possit, cuiuslibet mirum fore, non dubitamus. Est verò hujus generis *Ars*, ipsa *Medicina*. Nusquam utitur hæc *manibus*, nisi in sola *Chirurgia* instrumentali, à quâ proinde hic tantisper abstrahimus. In *pulsus* exploratione, longè plus *judicii* quàm *enchiriseos* requiri, nemo ambiget. Deprehendit verò *subjectum* suum, partes affectas, vel *sensu* satis crasso, vel *judicio*; *speciem* læsionis, partim *sensu* etiam parum subtili, maximam partem verò *judicio*: *Modum* etiam corrigendi assequitur vel solo magis *judicio*, vel sola magis *memoria*, in *experiments*, vel utrisque: *Modum* adhibendi, ratione temporis morbi, ratione *doscos*, ratione *regiminis* conjungendi, ratione mutua *subordinationis* diversorum Medicamentorum, exsequitur undique, partim *memoria*, secundum experientiam, partim *judicio*. Hæc omnia cur non *mente* & *intellectu* comprehendere, *memoria* retineri, ex eadem depromi, & quolibet tempore in effectum deduci valeant, nemo ullam difficultatis rationem perspexerit, Sed *optimi Theoretici*, sunt *pestimi Practici*. Est *Vir* profundè doctus, Es ist *Ghad* um den *Mann*/ hat trefflich wohl studiret/ hatt aber kein Glück zur *Praxi*: in der *Theorie* läßt sich trefflich hören/ aber in der *Praxi* geht es gar nicht an &c. vox populi, vox Dei. Et profectò verum est; & valet hic, si uspiam: *Interdum* *populus* rectum videt, est ubi peccat. Unde vero hoc malum, non certè *speculativum*, sed *practicum* *experimentale*? Non philosophabor, neque *Rhetoricabor*, sed nudè & *plane* to-



nè totam rem dicam *Theoria Physica*, nuda & sola, pessundet *Medicinam*, si loco *Medicæ Theoriæ* hauriatur. Quid appellem *Theoriam Physicam*, & quomodo ipsam distinguam à *Medicæ*, quæretur? Dicam. *Physica* tota hodiè in eo est, ut pro fundamentis rerum, agnoscat & consideret *materiam* earum, & *motum*. In *materia* individualiter, *figuram* & *magnitudinem*; aggregativè, *situm*, *porositatem*, *densitatem*, *pondus*, *elasticitatem* &c. Fatetur interim, quod ne quidem *fitus* in aggregatione, nedum *magnitudinis*, & *figuræ* in individuis, veram determinationem, ullatenus definire possit. Cum verò *motuum* diversitates, his rebus, tanquam fundamentis nitantur; imò, cum omnes *motus*, non nisi ab uno corpore in alterum *communicari* & *transmitti*, & concursu perpetuo mutuo, *continuari*, in tota rerum naturâ videamus; est inde, quod, cum habitum ad *motum* ignoremus, etiam *speciem motus à priori* dignoscere minimè valeamus. Unde sanè, non nisi purè à *posteriori*, magis suspicari, & probabiliter supponere, quàm ullo modo *deprehendere*, *dijudicare*, *demonstrare*, hic valeamus. Fundus verò mali est, quod hanc necessariam à *posteriori*, ab *Experientiâ*, *subsumptionem*, frequentissime fastidit atque negligit nostra ætas, & loco veræ, observationi respondentis, *actûalis* *historiæ*, & ejus debita applicationis ad *regulas figuræ & motus*, nihil nisi *probabilitatem* hypotheticam denique efformat, quæ ipso *actû* & *experientiâ*, non reperiatur. Sed absit, ut nos his brevibus profundius committamus. Ad nostram rem hoc dicendum est, quod, dum hodierna *Anthropologia* & *Anatomia*, magis unicè in scrutinio *structure* partium subsistit; ejusq; *habilitatem passivam ad motus*, omnibus adminiculis spectitat: *motus* verò, ut *activi*, *directi*, *destinati*, *circumstantias à priori*, *tempus* incipiendi, *gradum* impellendi, *proportionem* utriusque non solum ad partem immediatè *motam*; sed & ad *humorem* per hanc *movendum*; *mensuram* *durationis*, *energiam*, *constanciam*, *tenorem*, *continuationis*, &c. hæc omnia, inquam, dum negligit, quid proinde ad universam *historiam* de homine, *veri*, nedum, *solidi*, aut *connexi*, percipere, intelligere, deducere possit, in propatulo est. Quis enim v. gr. à *magnitudine*, aut *figura*, particularum e quibus: *dentes* efformantur, aut ex ipsorum *dentium*, *proportione*, rationem reddet, cur *dentes anteriores*, intrâ dimidium *primi septenarii* succrescant, ab eo ad *dimidium secundi*, excidant, & alii in ipsorum locum succedant? Quod *fami-*

ne, ordinariè ante *sesqui-septenarium* aut *secundi* exitum, non inci-
 piat *parere*; post *septimi* septenarii finem, non pergat? *Vir* verò, vel ad
sesqui-septenarios, *generare* valeat, si sanus sit, neque tamen & ipse an-
 tè *secundi* confinia incipere possit? tantò minus ex ullà ratione structu-
 ræ innotuerit, cur in gravibus, quos *acutos* dicimus, morbis, *septenari-
 um* dierum, ad *horas*, usque exquisitè, fervent *motus*; ubi profectò non
 parva erit implicatio, si *Febrem*, absolutè *morbum* dicas, & *motus* illos,
 ut puram *passionem* corporis consideres. Adscribenda erit illa defini-
 ta *mensura*, *materia*; quod ex nullo undique fundamento probabile;
 vel *structura*, quod æquæ ac superiora, nullo modo demonstrabile;
 vel alii *agenti* principio, quod non placet, neque cum *Hypothesibus*
 conformabile. Centum talia enumerarem, nisi Charta & tempus
 dissuaderet. Interim, dum hæc in *Physica Theoria* recepta, si non ne-
 gliguntur, non tamen nisi strictim & *superficialiter* memorantur, in-
 gens profectò *historia Anthropologicæ*, & notitiæ *Medicæ* detrimen-
 tum accrescit. De exemplum in substratâ materiâ. Adolescens 18.
 annorum, cætera benè sanus, incipit repentinis *Odontalgis* affici; *Me-
 dicus*, ad parentum indulgentiam officiosus, *purgat*, *sudores* injungit,
sopit maturè; post aliquod tempus, recursant dolores, laxat cum Epi-
 crasi, dat Sanguinem mundificantia, *Catarrhalia*, *sopit* iterum: Non diu
 post recrudescentes dolores, *sopit* ampliùs, & hoc sæpiùs: repullulan-
 tes subinde dolores, spernunt tandem mediocrem quoque *Narcosin*:
Svadetur deniq; *V. S.*, adhibetur, sed incassum. Adolescens, non pa-
 rum contribuentibus *Narcoticis*, fit notabiliter *Hypochondriacus*. In-
 terim *tument* perpetuo extremitates posteriores internæ maxillarum:
 tandem, post & inter varias medicationes, perrumpunt ultimi *maxil-
 lares*, *genuinos & sapientiæ* vocant, dentes; tunc demum longiori-
 bus intervallis, neque ferè nisi sub manifestis *Catarrhalibus* accidenti-
 bus, redeunt dolores. Vertentibus verò annis quo tempore *Vena
 secta* fuerat, variis modo *Catarrhalibus*, modò *Spasmodicis*, modò
inflammatoriis æstuosis, doloribus, exercitus juvenis, non nisi reas-
 sumpta *V.* Sine commodè sublevatur: & ita prompto successu eidem
 mancipatur. Hic sanè, si Medicus suspicionem talis *dentitionis* ha-
 buisset, Emollientibus, Relaxantibus, Nitrosis, Discutientibus Cam-
 phoratis, imò si nihil aliud, ipsa patientia, commodissime sublevasset
 patientem, quoad tandem dentes extrusi fuissent: quem illà intempe-
 ritivâ

stiva conturbatione, contraria conspersione, & non necassaria V. Sne, incommodissime exagitavit, & in Servitutem V. S., imò variam morbidam dispositionem coniecit.

Sed quid exemplis prolixis opus est. Quis non videt, quod illa notitia *historia*, quæ quidem *numerum, figuram, structuram* partium corporis percenset, sed *habitus* earum ad *morbos*, & hinc ad *curationem*, non attingit, *Physica* quidem sit, & ad *scientiam* pertineat, non verò *Medica*, ut artificem instruat, *quid & quomodo* juvare debeat. Brevibus repetò quædam. *Structura Meandrorum auris, incudis, mallei, stapetis*, & insignis inventi! *orbicularis osciculi*, si nescirentur, *Physicam* historiam omni modò *mancam* redderent: *Medicinam* non plus impedirent, quàm nives antè decem annos fusæ. *Figura humoris crystallini & vitrei*, imò plura alia in *oculi structura*, si in *Physica* nescirentur, dehonestarent certè notitiam & historiam: *Medicine* quid detrimenti inde accideret? *Intima structura fibrarum muscularium*, distributio per ipsas *nervulorum*, & tenerrimum *vasorum*; tot subtiles *lymphales ductus & vasa*, innumerabiles in *cute glandulæ*, *textura fibrillaris, reticularis*, ejus & aliarum membranarum, in *scientia Physica, sciri* debent: in *Medicina* oboli pretium usu non faciunt. Nihil verò impedit *Medicam, Theoria Physica sani corporis: Læsæ*, seu *Pathologia* purè *Physica*, gravissimè confundit & conturbat. Hæc est illud scandalum, quod vel *impossibilibus*, vel *inanibus*, vel non rarò *ridiculis, indicationibus, intentionibus, inventionibus*, exponit *Medicum*; hæc est, quæ *incertum*, in consilio, *trepidum* in experimento, *infelicem* in effectu, & *Praxi*, reddit *Medicum*. Fundamentum totius mali in eò situm est, quod *Physica* talis *Theoria*, *Mechanismi corpori* unice avida, *Mechanismum* seu potius *Organismum* **MOTUUM**, *tempus, gradum, directionem, finem, & energiam* atq; *activitatem* ad peragènda ea, quæ ad corporis *conservationem* pertinent, silentio prætereat; & quia *scientiam* eorum sperare non potest, etiam *notitiam & Historiam*, disimulet. Interim *Medici* primum fundamentum hoc est, quod sciat, *Motibus* omnia in corpore fieri, *motuum & plurimas* esse, & *gravissimas læsiones*, *motibus* in effectum deduci *medicamenta, motus esse restituendos, per motus esse sanandum*: ad horum *tempora, gradus, directiones, intentiones* seu fines, attendendum esse: hos non temerè *impellendos, suppressendos, perturbandos*:

hos efficacissimè alterari *animi moribus*, seu pathematibus, idq; im-
 mediatè, nè per somnium alterata *parte*: horum, citrà *corporalem*
 connexionem & communionem partium, esse *consensus*: horum esse
consuetudines: horum esse *hereditarias* dispositiones: horum esse spe-
 ciales quasi *decubitus* ad diversa loca, secundùm diversitatem *ætatum*.
 Huic *Theoriae*, non modo *historicè* veræ, sed *scientificè* connexæ & co-
 hærenti, & *conspirationem motuum ad conservationem & restaurati-*
onem corporis; *emotionem, expugnationem*, rerum noxiarum: super-
 struere suam *methodum*, juxtà eam suggere subsidia seu *remedia* sub-
 ordinare *tempus* administrationis, potest, imò *debet* Medicus, negle-
 cta, ut Medicus, *structura, textura*, subtilissimæ, Microscopia & Mi-
 crologiâ. Breviter, *Physica* est illa *Theoria*, quæquidem *veram, re-*
nerrimam, intimam, Structuram partium, & habitum hujus ad earum
 usum, curiosè, operosè, jucundè, spectat: *Lesionum* quoque modum
 subtilem *corporalem*, vel verè, vel hypotheticè, scrutatur: interim il-
 lud in *passionibus*, quod *Medicus Methodo* suâ attingerè possit, & qui-
 dem veraciter, & consentiente constanti experientiâ, præsentissimè,
 directè, immediate ita attingere & mutare valeat, hoc, inquam, vel non
 attingit, vel non secernit, aut ad usum quasi feligit; sed potius illa uni-
 cè spectitando, quæ *Medici & Medicamenti* directam contrectationem
 non ferunt, vel *inutilis* est Medico, vel eundem de omni *scientificâ*
Pathologia & Therapiae connexionem, desperare cogit, & ad nudas *Em-*
pirias, generalissimas *Therapias*, fallaces, & perbreves *palliationes*, a-
 digit. Dedi exemplum in Disputatione de *Autocrazia Natura*, de
 quolibet *vulnere*; quomodo ejus *Physico-Anatomica* Pathologia ex-
 quisitissima, ad *curam* instituendam & absolvendam, exquisitissimè
 supervacua sit: Et possent ejus generis centum specimina facile pro-
 duci, quorum plurima *nullam*, non pauca *falsam* indicationem seu
 suspicionem practicam hætenus suppeditarunt: quædam etiam ad te-
 merarias, non modò alienorum, & *intempestivorum*, sed noxiarum
motuum, provocationes & conturbationes, Practicos hujus turbæ fe-
 duxerunt: Sed sufficiat, digitum intendisse. Hæc est illa *Theoria*,
 quam suo loco & usui relictam, nullatenus rejicio; utpote *curiositatis*,
operositatis, Polyhistorie, damnatarum, non nisi per calumniam infi-
 mulandus. E. Medico verò foro, sollicitè & vigilantissimè exterminan-
 dam esse, censeo; & benè cayendum, ne nobis non solum nihil profit,

sed

sed reverà *obst*, dum vel machinamenta *corporea* supervacua persvadet, aut *intempestivas* commotiones inducere quasi jubet, quæ *positive nocent*: aut debitarum, intensio*rum* *Vitalis motus*, pro ipso morbo imperite explicatarum, cohibitiones, oppugnationes, inversiones suscipere facit: gravissimo, & irreparabili sæpenumerò, damno. *Medicam* verò *Theoriam*, illam dico, duco, commendo, quæ *motus* maximè attendat, quomodo iidem modo à *corporalibus* læsionibus, reverà *passive* turbentur, modò *active*, contra tales læsiones, intendantur & exacerbentur; quibus corporis habitibus, seu *temperamentis*, quibus *vita generibus*, quibus anni *tempestatibus*, quibus *ætatibus*, quibus *consuetudinibus*, quibus *progressis* morbis, aut pathematibus, accidant, succedant: ad quem *exitum* pervenire *possint* non modò, sed & communiter *soleant*. Quos *motus* requirat conservatio sanguinis, & per hunc, corporis; quos *motus*, *abundantia* ejus, aut suffocet, aut provocet: quid sequatur ex his rectè *succedentibus*, quid ex iisdem *non satis* succedentibus: Quid ex iisdem *intempestive* repressis, obnubilatis, consopitis; aut *alieno* tempore exstimulatis, &c. morbidi motus, quorsum solennitè *vergant*? quorsum commodiùs *ducantur*? quàm facile *recrudescere*, quàm constanter *perennare*, quem *ordinem* servare, quomodo *interruptiones* tolerare soleant. Qui ita *speculatus* fuerit, *Theoriam Medicinam* nanciscetur, *connexionem* scientificam inveniet, & *Practicus* ita certus inde evadet, ut & ipsa *cura*, & perita *Prognost*, ista artis, hæc scientiæ Medicæ, veritatem monstrare & asserere possit. Hæc *Theoria*, non speculationibus de *potentiis*, sed experientia de *actu*, superstructa, antiquabit illas exprobrationes, quas supra adduximus, quod *bonus Theoreticus*, tamen *malus Practicus* esse possit: Dummodò utique *materia Medica*, & ejus ad has res efficaciam; non modò memoriam, sed & exercitatum judiciosum seletum, conjunxerit. Summa verò, & princeps *Theoriæ Medicæ*, pars, quæ Praxin infelicem impedire possit, aut neglecta, hanc post se trahat, est *Benedictionis divinæ* imploratio, & grata agnitio bonitatis ejus, in energia medicamentis concessâ, elucescentis. Præfari hæc libuit Solenni commendationi, quam meretur Vir Juvenis Doctissimus.

DN. ANDREAS CHRISTIANUS RHETIUS,

Medicinæ Candidatus dignissimus,

Natus is est Arnstadii, Celsissimorum Comitum Schwarzburgicorum Sede. Patrem habuit Virum Excell. & Experientissimum DN.

JERE-



JEREMIAM RHETIUM, Med. Licent. & Physicum t. t. Arnstadien-
 sem ordinarium. Matrem BARBARAM CATHARINAM, DN.
 CHRISTIANI GUNTHERI FRICCII, Secretarii Celsi. Comitum
 meritisissimi, Filiam, Matronam honestissimam. Orbatus quidem o-
 ptimo patre, admodum puer; Avum tamen charissimum, cum dilectis-
 simâ Matre, Deo propitio retinuit, à quibus & educatus est, atque ad
 pietatem virtutemque instructus, & Virorum proborum doctorumque
 Informationi commissus est, ut ad Studia literarum prepararetur, eo-
 rumque principiis imbueretur. Inter quos gratâ mente celebrat Vi-
 ros Præcellentissimos, DN. M. JOHANNEM FRIDERICUM TREI-
 BER, Rectorem Spectatissimum, & DN. JOHANNEM NICOLA-
 UM FREITAG, Con-Rectorem meritisimum. Horum fide atque
 curâ, in Disciplinis liberalibus & Philosophicis abundè institutus, tan-
 dem anno 1694. Halam nostram ingressus, studioque Medico sese ad-
 dicens, manu ductione Professorum, studio & industriâ summâ, usus
 est. Audivit Excell. D. D. HOFFMANNUM in observationes Pot-
 terii publicè commentantem? Physica Principia, & productiones atque
 actiones Corporum Naturalium, Curiosis Experimentis illustrantem:
 nec non Corpora Humana utriusvis sexus, Anatomicè perscrutantem.
 Meum latus nunquam deseruit, quoties quidquam audire, videre, per-
 quirere, occasio tulit. Auditor perpetuus in Physiologia, Pathologiâ,
 Therapiâ, Materiâ Medicâ, Praxi: Tam Cursus quem vocant ordine,
 quam iterum publicis privatisq; Lectionibus, Commentationibus, Col-
 legiis. Spectator in Anatomiâ publicâ, Zootomiis privatis, Chymico
 Collegio duplici: Comes in Botanoporiis frequentissimis. Solers,
 assiduus, industrius, sobrius, modestus: Civis Academiæ nostræ probi-
 tate & honestate nemini omnium secundus. His gressibus emensus
 studiorum stadium, metam attigit. Compræbavit profectus solidos &
 laudatissimos duplici Examine solenni. Disputatione publicâ Practi-
 câ, de MORBIS HABITUALIBUS, ad huc semel publicè promptitu-
 dinem suam demonstrabit. Inde LICENTIAM Honores ac Titulos sum-
 mos in arte abeundi, Juribusque immunitatibus fruendi, impetrabit.
 Ad hunc actum solennem, Magnificum Dominum Pro-Rectorem, Ex-
 cellentissimos Academiæ Procures, Illustrissimos, Illustres, Generosos,
 Clarissimos, Hospites Fautores, Cultores, officiosissimè invito. P. P.
 Sub sigillo Facultatis d. XIV. Maji, M DC XCVIII.

(L.S.)



